

Reginaldus Henricus Nooyen a nase den un pueblo yamá Bakel, Noord Brabant, pegá ku Eindhoven. Na Bakel el a lanta komo mucha. For di Bakel el a bai studia na Nijmegen i Zwolle. Tabata na Nijmegen ku finalmente el a keda ordená komo pastor dia 26 di yüli 1944.

Nooyen a nase for di un famia bon katóliko, un famia konsistiendo di 8 yu. Pastor Nooyen for di mucha, tempu ku e tabata sirbi misa, huntu ku un amigu, tabatin interes òf vokashon pa bira pastor. Kombersando ku otro nan a bin pensa pa bai un seminario di un otro sosiedat di klero ku esun den kua el a dreña finalmente.

Tabata e Sosiedat di Hesus, ku tabatin un seminario na Hellmond. Nan a bai e seminario chikitu aki tambe, kaminda nan a keda dos aña. Nooyen a disidí despues di e dos aña ei pa kambia di kongregashon. Finalmente el a dreña e Órden di Padernan San Dominico, Padernan Dominikano, ku su kolegio na Nijmegen.

Despues ku el a keda ordená komo pastor na 1944, Nooyen a traha solamente dos aña komo pastor na Hulanda. El a haña enkargo e ora pa bini traha na Antia Hulandes. Semper e tabatin den su kabes pa bai traha den mishon. Nèt despues di Segundo Guera Mundial, na 1947, Pastor Nooyen ta yega Kòrsou pa promé bia. Huntu kuné a bini na bordo di e barku “Johan de Wit”, un barku blanku grandi, tambe pastornan Fick, Annink i Lensen.

E promé parokia na unda Nooyen a bai tabata Pietermaai, kaminda el a keda dos luna, huntu ku e otro pastornan, pa aklamatisá haña instrukshonnan den kustumber i kultura di Kòrsou, tambe e promé lèsnan den idioma papiamentu. Despues el a bai parokia di Santa Rosa, na unda el a keda dos aña. Seguidamente Pastor Nooyen a bai traha dos aña na parokia di Groot Kwartier, pa bolbe Santa Rosa pa dos aña.

Despues di un fakansi na Hulanda, Pastor Nooyen a keda stashoná na Boneiru, parokia di Coromoto na Antriol, nèt den e tempu ku e parokia aki tabata birando realidat na aña 1955. For di Boneiru Pastor Nooyen a bai traha na parokia di Noord, Aruba, na unda el a keda te na aña 1966, kaminda el a keda seis aña. Despues di Aruba el a traha kòrtiku den diferente parokia na Kòrsou, manera na entre otro Brievengat, Santa Rosa, Jandoret, Janwe i Steenrijk. For di Steenrijk ela regresá Boneiru na prinsipio di aña 1980.

Pastor Nooyen a hasi un trabou enorme den registrashon di historia di e islanan di Antia Hulandes.

Banda di su trabou religioso, Pastor Nooyen a bira konosí na Aruba, Kòrsou i Boneiru komo investigadó di historia, arkeólogo i eskritor. E promé buki ku Pastor Nooyen a skirbi tabata na aña 1951, no muchu tempu despues ku el a yega Kòrsou. El a skirbi e manuskrito originalmente na hulandes i J. Kroon a tradusí esaki p’e. Título di e buki aki ta: **ANGEL OBIA – Un Jonge Wachter di Kòrsou.**

Pastor Nooyen tabata trahando komo pastor na parokia di Santa Rosa na momentu ku Angel Obia, un hóben ku tabata den Jonge Wacht, a fayesé. El a eksperensiá e bida ehemplar di e hóben aki hopi djaserka i a keda bou di impreshon di esaki. Despues di e morto di Angel Obia, Pastor Nooyen a papia ku famianan di e hóben i otro personanan ku a konos’é djaserka i ku e informashon aki el a produsí su promé buki, konsistiendo di 60 página, rekonstruyendo e bida di Angel Obia.

Despues di Kòrsou, Pastor Nooyen a bai traha na Boneiru, kaminda el a investigá historia di e isla aki, spesialmente pa loke ta trata e Indjannan. El a hasi algun trabou di arkeologia, a papia ku hende grandinan, a studia dokumento, pa a publiká un otro buki na aña 1959: **CORNELIS MARTEN I CIEN AÑA DI BONEIRU**. Ta trata di un buki den kua ta trata deskubrimentu di Boneiru, e Indjannan ku a biba riba e isla, e sitionan na unda nan a bida, algu di tempu di sklabilitut, orígen di famianan boneriano i komo tema sentral un biografia di Cornelis Marten, alias Papa Cornes. Pastor Nooyen a sigui ku su investigashonnan na Aruba, kaminda el a traha komo pastor na Noord. Na Aruba el a publiká dos buki: **Historia di Alto Vista** na 1962 i **Millefiori di Aruba** na 1965. Dos buki importante pa e isla Aruba. Ademas el a skirbi e seri **“Aruba Nostra”** den e korant Amigoe den e periodo di 1966 pa 1967.

Bèk na Kòrsou Pastor Nooyen a publiká diferente otro buki. Por menshoná aki entre otro **“Van Bellefaas Martis tot Angel Obia”**, ku ta kontené un historia di Santa Rosa. Tambe tin e buki **‘Tot Memorie’**, ku ta krónika di dos kòster di parokia Santa Ana na Kòrsou, Bartholomeus Senior i su yu Bartholomeus Senior Junior. Mas aleu por menshoná e buki **“Isla de Los Santos”** na 1970, ku ta bai tokante e mishon di Padernan Dominikano riba e islanan antiano. Un otro buki importante ta **“Het Volk van de Grote Manaure”** i tambe **“De Slavenparochie Curacao rond het jaar 1750”**, ku ta bai tokante respektivamente e Indjan i katibunan di Kòrsou. Den e korant La Union Nooyen a skirbi den añanan setenta un seri históriko titulá **‘Fransesnan den siglo 18 i 19 na Kòrsou’**. Tambe el a skirbi den e periodo ei un seri titulá **“Historia Demográfiko di Algun Plantashi di Kòrsou”**. E manuskritonan aki t’ei i Kas di Kultura ta hasiendo e trámitenan publiká nan.

Ta bon pa bisa ku un parti grandi di e investigashonnan ku Pastor Nooyen a hasi ta basá riba konsulta di bukinan di boutismo, matrimonio i fayerimentu di Iglesia Katóliko ku tabata wardá den archivo di Obispado di Willemstad. E archivo aki a bai pèrdí den e disturbionan di 30 di mei 1969 debí na kandela na e kas di Obispu. Esaki ta hasi e investigashonnan ku Nooyen a realisá aun mas importante i balioso pa Kòrsou.

Banda di e archivonan di Iglesia Katóliko, Nooyen a praktiká arkeologia tantu na Kòrsou, komo Aruba i Boneiru. Den e buki **‘Het Volk van de Grote Manaure’** e ta deskribí vários sitio na unda Indjanan a biba, basá riba investigashonnan ku el a hasi. Artefaktonan ku el a deskubrí el a pone na disposishon di AAINA den pasado.

Bibliografia di Nooyen konserniendo Kòrsou

Angel Obia – Un Jongewachter di Kòrsou (1951)

Tot Memorie - Bartolomeus Senior en Bartolomeus Senior Junior

Van Bellefaas Martis tot Angel Obia : Een geschiedenis van Santa Rosa / door R.H.

Nooyen. - Curaçao : [s.n.], 1970. - 79 p. : ill. ; 25 cm

Het volk van de grote Manaure : De Indianen op de Gigantes-eilanden / door R.H.

Nooyen. - Curaçao : [s.n.], 1979. - 176 p. : ill. ; 21 cm.

*De Slavenparochie van Curacao rond het jaar 1750 : een demografie van het
katholieke volksdeel / R.H. Nooijen. - Curaçao : AAINA, 1995. - 126 p. ; 26 cm*

*Isla de los Santos : Honderd jaar Paters Dominicanen op de Nederlandse Antillen :
1870 - 11 juli - 1970 / samengest. door R.H. Nooyen en J. van der Lee.*

*Historia Demográfiko di algun plantashi di Kòrsou (manuskrito)**

*Fransestan den siglo 18 i 19 na Kòrsou (manuskrito) ***

* *E manuskrito aki ta serka Kas di Kultura di Kòrsou relashoná ku plannan pa publikashon.*

** *E manuskrito aki ta serka Prins Bernhardfonds Kòrsou relashoná ku plannan pa publikashon.*

E bukinan publiká ta den kolekshonnan di tantu na Biblioteca di Kòrsou, Biblioteca Mongui Maduro komo Archivo Nashonal komo prueba di e trabou ku Nooyen a hasi.

NOTA ADISHONAL.

Na luna di ougùstùs 2008 Pastor Nooyen, debí na su edat ya haltu, ta bai bandoná Antia Hulandes den forma definitivo. E lo no regresá mas, di manera ku esaki ta e úniko i último oportunitat ku por dun'é Krus di Mérito. Lo no tin nada mas bunita ku, serando e kapítulo di su bida i trabou riba e islanan aki, presentá Pastor Nooyen e rekonosimentu aki pa e trabou balioso ku el a hasi pa Kòrsou, investigando i registrando tópickonan hopi importante den historia di Kòrsou.

Pastor Nooyen, pa trabounan similar, riba base completamente boluntario, a keda rekonosé den pasado na Boneiru komo 'Siudadano di Honor'. Ademas el a yega di haña un kondekorashon real.

Bòi Antoin
Mei 2008